

- प्रधानमंत्री नरेन्द्र मोदी री मौजूदगी मांय जैसलमेर रा पोकरण मांय आज देश री सेना रा तीन्यू अंगां रो भेळो अभ्यास भारत शक्ति सरु व्हयो- प्रधानमंत्री कह्यो-सरकार देश ने रक्षा हलका मांय खुद रे पाण ऊबो करण सारु केई मोटा जतन कीना।
- प्रधानमंत्री अहमदाबाद ऊं 85 हजार करोड़ रुपया ऊं बत्ता खर्च वाळी रेल परियोजनावां देश ने सूपी अर आधारशिला रखी -प्रदेश ने ई रेलवे ने नुवी बणावण अर विकास री केई सौगातां मिली।
- राज्यपाल कलराज मिश्र चिकित्सा शिक्षा रा पाठ्यक्रमां ने लगातार अपडेट करण बाबत् कह्यो- राजस्थान स्वास्थ्य विज्ञान विश्वविद्यालय रा दीक्षांत समारोह ने सम्बोधित कीना।
- प्रदेश मांय दिन अर रात रा तापमान मांय बधोतरी- गर्मी रो असर महसूस व्हेवण लाग्यो।

000

प्रधानमंत्री नरेन्द्र मोदी कह्यो है के विकसित भारत री कल्पना खुद रे पाण ऊबा भारत बगैर संभव नी है। वे कह्यो के देश ने विकसित व्हेवणो है तो म्हांने दूजां माथे निर्भरता कम करणी व्हेला। वे आज जैसलमेर रा पोकरण फील्ड फायरिंग रेंज मांय फौज रा तीन्यू अंगां रा भेळा युद्धाभ्यास 'भारत शक्ति' ने देख्यां पाछे राख्यी ज्या कार्यक्रम मांय बोल रह्या हा। वे कह्यो के आज देश खावण रा तेल ऊं ले र नुवा लडाकू विमान तांई हर हलका मांय खुद रे पाण ऊबो व्हेवण परां जोर दे रह्यो है। वे कह्यो के 'मेक इन इंडिया' री कामयाबी म्हांं सामी है अर फौज भारत मांय बण्या आधुनिक उपकरण अर हथियार काम ले रही है, जो भारत री ताकत है।

.....

वे कह्यो के देश ने रक्षा हलका मांय खुद रे पाण ऊबो करण सारु केई मोटा जतन करी ज्या है। प्रधानमंत्री कह्यो के पॉलिसी लेवल माथे केई भांत रा सुधार करी ज्या अर प्राइवेट सेक्टर ने ई इण ऊं जोड़ी ज्या है। वे कह्यो के उत्तर प्रदेश अर तमिलनाडु मांय डिफेंस कॉरिडोर बण रह्या है। आं मांय हाल तांई सात हजार करोड़ रुपया रो निवेश करी ज्यो है। हेलीकॉप्टर बणावण वाळी एशिया री सब ऊं मोटी कंपनी भारत मांय काम करणो सरु कर दीनो है। लारला दस साल मांय करीब 6 लाख करोड़ रुपया रा रक्षा उपकरण स्वदेशी कंपनियां ऊं खरीदया ज्या। रक्षा उत्पादन दो गुना ऊं बत्तो करीब एक लाख करोड़ रुपया मोल रो व्हे ग्यो है। प्रधानमंत्री कह्यो के रक्षा हलका मांसंय खुद रे पाण ऊबो व्हेतो भारत फौज रा खुद माथे भरोसा री गारंटी है। वे कह्यो के कैबिनेट हाल ही मांय फौसलो कीनो के पांचवी पीढी रा लडाकू विमान ई देश मांय ई बणाया जावेला।

.....

000

केंद्रीय स्वास्थ्य मंत्री डॉ मनसुख मांडविया न्हाना कारोबारियां सारु प्रधानमंत्री भारतीय जन औषधि केंद्र स्थापित करण सारु ऋण कार्यक्रम रो शुभारंभ कीनो। ई कार्यक्रम रा तैत भारतीय लघु उद्योग विकास बैंक-सिडबी बिना गारंटी कारोबारियां ने कम ब्याज परां कर्ज मुहैया करावेला। आज नई दिल्ली मांय एक जनसभा मांय डॉ. मांडविया कह्यो के ओ कार्यक्रम न्हाना कारोबारियां ने जन औषधि केंद्रां ने बधावो देवण अर वां ने और बेहतर बणावण मांय मदद करेला।

000

प्रधानमंत्री नरेन्द्र मोदी आज गुजरात रा अहमदाबाद ऊं रेलवे री 85 हजार करोड रुपया ऊं बत्ता खर्च री परियोजनावां वर्चुअल तरीका ऊं देश ने सूंपी अर आधारशिला रखी। प्रधानमंत्री वंदे भारत समेत केई रेल सेवावां री ई हरी झण्डी बता र सरुआत कीनी। ई मौके राखी ज्या जळसा मांय प्रधानमंत्री कह्यो के भारतीय रेल विकसित भारत रा संकल्प ने सांचो करण मांय अहम भूमिका निभा रही है।

वे कह्यो के सरकार रेल नेटवर्क ने बधावण, बुनियादी ढांचा ने नुवो बणावण, मुसाफिरां सारु सुबीता बधावण अर रेलवे प्लेटफॉर्म माथे मेक इन इंडिया उत्पादां री बिक्री ने बधावो देवण सारु लगातार काम कर रही है। वे कह्यो के भारतीय रेल खुद रे पाण ऊबा भारत सारु सब ऊं ताकतवर माध्यमां मांय ऊं एक है।

.....

आज प्रदेश ने ई केई सौगातां मिली। अजमेर ऊं दिल्ली ताई चालण वाळी वंदे भारत रेलगाडी चण्डीगढ ताई बधा दीरीजी है। प्रधानमंत्री जयपुर मंडल रा धानक्या अर रेवाडी जंक्शन टेशन स्थित माल गोदाम अर जयपुर समेत प्रदेश रा चार टेशनां माथे वन स्टेशन वन प्रोडक्ट स्टॉल्स रो वर्चुअल तरीका ऊं लोकार्पण कीनो। राज्यपाल कलराज मिश्र ई कार्यक्रम ऊं राजभवन ऊं वर्चुअल तरीका ऊं जुड्या। राज्यपाल आं परियोजनावां रा शिलान्यास अर लोकार्पण ने ऐतिहासिक बताता थकां प्रधानमंत्री रो आभार जतायो। वे कह्यो के इण ऊं आवता बगत मांय रेल परिवहन रे जरिए देश री माली व्यवस्था मजबूत बणेला। मुख्यमंत्री भजनलाल शर्मा जैसलमेर ऊं इण कार्यक्रम ऊं वीडियो कॉन्फ्रेंसिंग रे जरिये जुड्या। प्रधानमंत्री जैसलमेर रेलवे टेशन माथे करीब 55 करोड रुपया रा खर्च रा कामां रो ई आज लोकार्पण कीनो। भरतपुर रेलवे टेशन माथे वन स्टेशन वन प्रोडक्ट अर रेल कोच रेस्टोरेंट री आज सरुआत व्ही। अठे शहद री स्टॉल लगायी ज्यी है। बीकानेर मंडल माथे 25 वन स्टेशन वन प्रोडक्ट स्टॉल रो आज लोकार्पण करी ज्यो। इण मौके बीकानेर टेशन माथे राखी ज्या कार्यक्रम मांय केन्द्रीय कानून मंत्री अर्जुनराम मेघवाल ई मौजूद रह्या। अलवर अर डूंगरपुर रेलवे टेशनां माथे ई कार्यक्रम राखी ज्या। सवाईमाधोपुर रेलवे टेशन माथे आज भारतीय जन औषधि केन्द्र री सरुआत करीजी। प्रधानमंत्री आज दस नुवी वंदे भारत रेलगाडियां ने ई रवाना कीनी।

000

कांग्रेस आज 43 उम्मीदवारां री दूजी लिस्ट जारी कीनी। इण मांय राजस्थान ऊं दस सीटां माथे उम्मीदवारां रा नाम रो ऐलाण करी ज्यो है। लिस्ट मांय जालौर ऊं वैभव गहलोत, बीकानेर ऊं गोविंदराम मेघवाल, चूरू ऊं राहुल कस्वा, झुंझुनू ऊं बृजेंद्र ओला, अलवर ऊंललित यादव, उदयपुर ऊंताराचंद मीना और चित्तौड़गढ ऊं उदयलाल आंजना ने टिकिट दिया ज्या है। जोधपुर ऊं करण सिंह, टोंक-सवाईमाधोपुर ऊं हरीश मीणा अर भरतपुर ऊं संजना जाटव ने टिकिट दियो ज्यो है।

000

लोकसभा चुनाव ने ध्यान राखता थकां प्रदेश मांय स्वीप गतिविधियां चलायी जा रही हैं। भीलवाडा रा राजकीय कन्या महाविद्यालय मांय मतदाता जागरूकता कार्यक्रम राख र छात्रावां ने वोटर हेल्पलाइन एप, केवाईसी एप, सी विजिल एप, अर चुनाव ऊं जुड्या न्यारा-न्यारा एप री जाणकारी दीरीजी अर वोट जरूर देवण री सौगंध दिरायी ज्यी। ई मौके छात्रावां मतदाता जागरूकता ऊं जुडी रंगौली बणा र वोट जरूर देवण रो संदेश दीनो। सवाईमाधोपुर रा स्वामी विवेकानन्द मॉडल स्कूल सूरवाल मांय कार्यक्रम रा तैत स्कूल मांय मतदान मेरा अधिकार री रंगौली बणायी ज्यी अर विद्यार्थी मानव श्रृंखला बणा र वोट जरूर देवण रो संदेश दीनो।

000

प्रदेश मांय दिन अर रात रा तापमान मांय बधोतरी रे कारण गर्मी रो असर बधबा लाग्यो है। घणखर ठोडां अधिकतम तापमान 35 डिग्री अर न्यूनतम तापमान 18 डिग्री सेल्सियस रे आरे-सारे चाल रह्यो है। मौसम विभाग रे मुजब सब ऊं बत्तो 35 दशमलव 4 डिग्री सेल्सियस तापमान डूंगरपुर मांय दर्ज करी ज्यो, जदके सब ऊं कम 13 डिग्री सेल्सियस तापमान सिरौही मांय दर्ज करी ज्यो। मौसम केन्द्र जयपुर रे मुजब काल अर परसों राज्य रा आथुणी अर उत्तराद हलकां मांय कठे-कठे एक और कमजोर पश्चिमी विक्षोभ रे कारण जोधपुर अर बीकानेर संभाग रा सरहदी हलकां मांय बादळा मंड्या रेहवण अर छुटपुट ठोडां हल्की बिरखा रा आसार है।

000